

欽定剿平粵匪方略

欽定勦平粵匪方略卷五 辛亥年

六月初一日丙辰湖南巡撫駱秉章湖南提督余

萬清奏言廣西武宣竄出之賊已至象州之百
丈中坪等村盤踞此股賊匪若竄往廣東廣甯
等處與賀縣賊匪合股必須由修仁荔浦平樂
賀縣懷集等府縣經過道里較遠現經廣西提
臣向榮統帶大兵駐紮修仁之桐木石牆截其

竄路其賀縣賊匪亦據探報現有廣東廣西兵
勇三千餘名在廣甯交界扼要堵截該二股賊
匪似難遽行竄合至桂林一路凡湖南邊界可
與相通之處早已酌派官兵嚴密防堵嗣因武
宣賊匪竄出象州接准粵省咨會派兵堵剿復
經添調提標等營官兵一千二百名馳往分布
扼要協防並經督臣程雷采飭令永州鎮總兵

厚集兵力遙作聲援臣等惟當隨時查察情形妥籌辦理如有可以應援之處卽由臣余萬清統率兵勇不分畛域馳往協力堵勦奏入報

同日周天爵烏蘭泰向榮奏言逆匪竄踞象州中坪百丈新寨一帶知大兵將至窮蹙無聊而賊巢鉛彈稀少至有用銅錢者臣等與各鎮往

返籌商非急戰賊必捨命豕突過急又必致死
於我惟各處列營徐徐進逼使賊不能乘隙竄
出而掎角之勢成臣烏蘭泰統帶貴州鎮遠鎮
古州鎮威甯鎮三營官兵共四千名於五月初
八日自羅秀拔營前進至獨蘆山南梁山村地
方紮駐距中坪四五里許臣向榮於是日由桐
木拔營至界嶺紮駐扼守中坪之東總兵經文

岱與知府張敬修由林村至寺村紮駐皆不出
十里內外各營隨帶壯練環峙其旁初九日賊
於東面山頭聚集四五百人搖旗出隊其後布
滿山谷有賊數千直逼臣烏蘭泰三鎮大營而
各處營盤尙未整齊不能救援臣烏蘭泰當卽
派隊分路轟擊斃賊多名該匪敗退初十日據
探報有賊匪數千渡河直撲威甯鎮營盤臣烏

蘭泰遂督率三鎮官兵排隊出營該匪分十數股約四五千人礮子如雨臣烏蘭泰嚴飭官兵仍舊站隊一面督兵施放大礮火箭打中賊巢望樓賊向下走我兵分投迎擊臣烏蘭泰往來指揮親督官兵奮勇攻殺先將西南山頭賊匪擊敗復由獨龍山腳過橋直撲賊隊該匪大小隊伍數十層擊退一層後層又上前迎拒我兵

自寅至巳戰至四時之久將該匪隊伍全行擊
散惟西南山頭尙有賊匪數十參將馬善寶等
見賊已奔率衆大呼策馬竟渡臣烏蘭泰止之
不及逾河里許該匪已敗者忽然站住西南山
谷間突出數百人橫攔歸路我馬先陷田泥中
參將馬善寶等陣亡臣烏蘭泰催衆力救將賊
匪擊退此次大勝之後該將領等見賊如仇一

意酣戰致有疏虞賊燄更兇自當休息兵力暫回各營俟厚集大兵再圖埽蕩

周天爵烏蘭泰向榮又奏言知府張敬修帶領壯勇往寺村一帶有賊三四百人開礮抗拒官軍施放大礮斃賊數名餘匪奔回巢穴初十日張敬修等由廟旺至寺村進剿殺斃騎馬僞中軍先鋒一名僞後軍夥黨一名十一日臣周天

爵帶領兵勇馳赴寺村會勦張敬修等已於巳
刻由橋東山口進兵當時賊分三股來拒每股
約七八百人該員等當派兵勇先伏澗谷閒亦
分三路攻擊連放槍礮斃匪百餘名各賊棄械
驚走張敬修等追至數里突有一股攔住迎拒
副將常祿親點擡槍擊斃二賊賊匪膽落又殺
數十人十二日張敬修等率領官軍由寺村廻

東之長烈嶺分投進勦午刻賊自東南來當催
福勇迎擊賊又分兩股布滿山嶺於是福勇及
張釗之勇先行接仗東勇繼之開礮迎擊賊匪
墜下厓谷閒已而西股賊匪沿山來者英勇一
見大呼輒走而東潤西潤之伏賊蠭擁而至官
軍短兵相接用矛戳斃數十人始行敗去又有
股匪從後繞至經文岱張敬修帶兵迎之大戰

良久賊衆散走殺斃二百餘匪惟儘西面一股英勇無故喊走鎮道目睹此狀知英勇隊中必有賊匪隨傳令整隊而下迨所有兵勇皆自東來兜圍該匪始不能支斃賊三百餘名時已昏暗我軍收兵回營現在晝夜規畫仍行固守以待新兵大集再行逼進奏入

上命軍機大臣傳諭賽尙阿曰此次知府張敬修總兵

經文岱等由寺村迤東之長烈嶺進勦福勇東勇開
敵迎擊賊匪紛紛落下匡谷惟新到桂平平南之英
勇一見大呼輒行走散而東澗西澗之伏賊蠶擁而
出以致賊匪未受大創是英勇隊中顯有賊匪夥黨
假名暗伏詭譖伎倆殊堪痛恨兩軍對壘不能不藉
資壯勇以助兵力若謂盡屬可疑則防不勝防必難
期其用命若謂概屬可信又恐墮其奸謀應如何密

查嚴防俾爲我用不爲賊用之處務當於招募之初責成管帶之人悉心體察勿使奸徒溷跡方爲妥善此次新到英勇究由何處招募著卽密查具奏

上諭內閣曰逆匪竄踞象州經烏蘭泰督兵攻剿大獲勝仗烏蘭泰調度有方殊堪嘉尚著交部從優議敘所有在事出力文武著賽尙阿查明保奏候朕施恩其陣亡之貴州撫標中軍參將馬善寶鎮遠鎮遊擊

博勒果布威甯鎮中軍遊擊劉定泰等雖因乘勝輕進究屬奮勇捐軀均著交部賜卹

初二日丁賽尙阿奏言臣自五月初九日渡江

行次武昌兼程前進十七日馳抵長沙所調川省官兵趕到者俱令陸續由水路趨行臣與達洪阿巴清德分起由陸路前進伏查粵西賊匪股數雖多而以武宣爲最鉅目今竄出象州四

路劫掠官兵雖有八千餘名在彼防守而得力者僅能過半一俟大兵雲集似尙無難得手聞象州匪徒數雖巨萬而裏脅之良民烏合之游手實居大半象州得手則各股自成破竹之勢俟臣到粵後與在事文武妥爲布置以求萬全賽尙阿又奏言周天爵如已遵

旨回省擬令統帶所募皖勇二百名前赴楚粵交界之

江華縣地方督同該處文武駐紮防堵再安徽
所謂兵一千名傳有不甚安靜之說晤達洪阿
據云途間目睹安徽兵未免輾弱到粵恐難得
力惟旣已調往應俟臣到粵後親爲查閱或分
營布置以資教演俾收實用奏入

上命軍機大臣傳諭賽尙阿曰象州之賊固應厚集兵
團迅速剿滅其南甯太平一帶及懷集奔竄各匪亦

應分派大員帶兵前往督勦現在巴清德達洪阿亦
次第到粵各省鎮將足資調遣著該大臣審度地勢
人材某處應派何路官兵何人管帶可期得力某處
官兵應派何人接應務使聲勢聯絡凡賊巢險隘誘
伏處所必須偵探的確庶可一鼓殲擒至糧臺尤關
緊要卽著選派弁兵嚴密保衛並分置各處俾利轉
輸不可稍存大意朕觀烏蘭泰頗有謀略紀律向榮

亦久歷戎行必能與巴清德達洪阿等助卿宣力同心迅奏膚公也周天爵前已有旨諭令來京毋庸留於江華防堵所募皖勇二百名應如何分在管帶酌量辦理前調安徽兵一千名既屬輶弱又沿途不甚安靜恐難得力著隨時查察分營布置其統帶將弁不能約束卽著查明叅奏

初六日辛酉四川總督徐澤醇奏言初次所調重

慶等鎮兵丁一千名已於四月十四十五等日
自巫山秀山分投啟行出境二次所調軍督提
三標兵丁一千名於四月三十日行出川境至
三次所調川兵共一千四百名均由營起程計
五月二十五日以前亦可全出川境奏入報

聞

同日湖廣總督程矞采奏言臣查廣西武宣大

股逆匪現已竄至象州之百丈中坪等村盤踞
勢頗鴟張已近湖南邊界現據撫臣駱秉章提
臣余萬清添調官兵一千二百名於江華縣屬
之最要尖山及永明縣屬之最要龍虎關等處
嚴加防堵其餘要隘亦俱分布兵勇遙作聲援
近據探報廣西大兵駐紮修仁縣之桐木石牆
截賊竄越荔浦平樂之路而賀縣賊匪又有廣

東廣西兵勇扼要嚴防似難再行糾合其與湖南交界者防範現俱周密但恐大兵雲集一經會剿難保不狼奔豕突設有警報臣卽嘗督兵馳往堵剿奏入

上諭曰設若楚南有警必須汝馳往剿辦仍應一面啟行一面奏聞毋稍遲滯

十一日丙寅烏蘭泰奏言臣於四月二十九日馳

赴羅秀軍營將秦定三所帶官兵二千二百名
查點內除前次打仗陣亡及受傷患病並遣回
原營外僅有一千六百三十四名按名挑選年
青力壯可以教戰者一千名將擡槍鳥槍長矛
等項器械分給教以打仗陣式並將軍營一切
條規紀律逐一傳示以期殺賊立功其羅秀所
駐之兵尙有貴州威甯鎮重綸統帶一千名署

古州鎮李瑞統帶八百名五月初七日接周天
爵咨會飛檄各路官兵拔營逼近賊巢屯紮剋
日四面圍剿初八日並准向榮知會已督兵由
桐木進紮臣卽會商署古州鎮臣李瑞並知會
威甯營帶兵官佟攀梅等卽於初九日拔營逼
近賊巢並選兵練共一千名整隊先進招募鄉
民指引至獨鼈山南梁山村一帶相度形勢其

地一片平陽東臨大河河東中坪仁義等村俱
在目前警見中坪村北第一山頭賊匪望樓有
人搖旗臣卽將大兵調過山南並令古州威甯
二營兵各分六隊排列時由仁義村竄出賊匪
三四十人被我兵用擡槍擊斃二名餘匪竄回
其望樓下賊匪已聚集六七百人用大礮向我
軍施放隨令旗營官兵開礮打中賊之望樓賊

匪卽紛紛潰散因恐該匪狡猾全軍未敢遽撤
至晚始整隊回營其威甯營紮在西邊山頭古
州營在中間初十日有賊匪數千蠭擁渡河而
來臣當令佟攀梅往前開敵迎敵大股賊匪已
至橋南開礮向我兵轟打礮子如雨我兵因得
地勢由高臨下槍礮火箭齊發該匪前隊旣斃
後隊又進由稻田奔竄山西角直撲我營我兵

用槍齊打該匪前隊倒斃後隊回奔臣見其勢
已倒卽令各伍整隊過橋追殺大獲全勝西南
高山打礮之賊經威甯營轟擊潰散適有由山
上逃下十數賊奔梁山村經我兵擊斃僅贖七
賊復奔上西山梁離威甯營不遠乃威甯敵兵
因無長器械在手退回隊內賊見敵兵已退直
撲威甯大隊大隊之兵亦卽退回營盤賊乘勢

追撲以致該營之兵全行棄營奔潰伏思千兵
不敵七賊實出情理之外乃因該營全軍奔潰
下山其南山頭之賊亦卽撲來用威甯營之敵
直攻臣營臣入營防守見東南面似可保住卽
赴西北面照料適旗營兵並鎮遠兵大聲呐喊
首先上山富珠隆阿帶威甯兵隨同擁上該匪
棄營南竄我兵復奪回威甯營是日由寅至午

勝而誤敗敗而復勝轉戰四時之久共陣亡大
小官十五員額外馬步兵丁二百四十二名廣
州駐防旗兵七名受傷官兵四十四名臣布置
不善以致傷亡官兵二百餘名之多咎無可辭
惟有請

旨治臣重罪至威甯鎮官兵怯懦敗退至誤全軍該鎮
重綸因病未在軍營其帶兵官署副將佟攀梅

署參將慶祿等不能約束亦不敢不據實奏明
請

旨治罪

烏蘭泰又奏言五月十一日提臣向榮前軍移
進都金嶺周天爵由寺村進得勝十二日復戰
未利至晚官兵壯勇俱退回象州其寺村一路
俱空接周天爵回信言十二日寺村之戰英勇

內有奸細呼衆先逃兵勇不能支持連夜回到
象州囑臣察看形勢如獨鼈山勢不可守卽移
於羅秀防堵俟續調大兵到齊再行會勦因思
圍勦之局已散獨鼈距中坪甚近孤軍臨敵舉
目皆賊其地可戰不可守故於十六日率三營
黔兵俱撤回羅秀仍歸舊營向榮仍駐界嶺與
羅秀相距六七里聲援相應再向榮久歷戎行

勇敢有爲屢著戰功惟此次統帶楚兵始而攻
勦流匪屢戰屢捷因之或有大意又因向繼雄
不知避嫌以致楚兵藉口更因周天爵精神不
及未能設法調度向榮知楚兵心離自挽無術
故有諉卸之處然久歷戎行熟悉戰陣現在軍
營鎮將弁員均有不及向榮者賽尙阿到時必
能激勵勸勉或更易其兵則向榮必知感奮仍

可立功

烏蘭泰又奏言遵查向榮之子五品廕生向繼雄隨向榮在軍營效力不能避嫌跡近干預又因向榮保伊子花翎以致衆心不服楚兵藉端挾制是周天爵所奏向榮曲徇其子致失人心不爲無因此次探聞賊匪有北竄之信經周天爵屢次札飭秦定三周鳳岐堵追接應該二人

延不用命一節查賊匪在武宣東鄉秦定三周
鳳岐共駐一營在東面堵禦與管帶東勇之現
署右江道張敬修營盤相連四月十五日夜閒
賊匪竄出未能堵禦十六日追賊至官橋打仗
已勝因兵無鍋帳復回十七日又在二塘紮營
未能尾追延不用命亦屬實情惟張敬修管帶
東勇八百名與秦定三連營防堵周天爵現叅

秦定三周鳳岐未叅張敬修人心亦有不服至
統帶楚兵之副將博春和春係向榮隨營將官
臣未到武宣以前聞本年三月初二日與賊匪
打仗不利周天爵責秦定三不前後訪知秦定
三並無退縮之處卽言向榮推卸而周天爵與
向榮向榮與秦定三均似因之有隙以致不和
周天爵爲人居心本直惟性強耳輞年老精神

不及以致其子周光岳從中干預致失人心奏

八

上命軍機大臣傳諭賽尙阿烏蘭泰曰此次進兵獨龍山南連獲勝仗僅賸七賊復上山梁直撲威甯大營該營官兵計有千人何以不敢出營抵禦致有挫折著賽尙阿卽查明該營弁兵究係何人首先奔潰按律懲辦以肅軍令威甯鎮總兵重綸是否實係因病

並未在營抑係有心規避確查具奏再向榮所帶湖南弁兵初到粵時頗覺勇往是否因向繼雄濫得保舉解體抑係該弁兵等恃勝驕悍不聽號令旣不得力卽留營亦恐誤事現在湖南防堵緊要亦須兵力著賽尙阿到營察看是否可以裁撤或令仍回本省防堵向榮籍隸四川現調四川兵有四千餘名或卽酌撥數千交向榮管帶似此量爲轉移可資得力其

威甯鎮潰散之兵勢不足恃應如何安插裁撤之處亦著酌量辦理至烏蘭泰覆奏查明軍營主將不和緣由湖南副將博春和春不能稟請追賊及張敬修獨未被叅等情著與前此疊降諭旨飭令查覈功過各件一併確查據實具奏

上諭內閣曰據烏蘭泰奏稱五月初九日梁山村接仗先已獲勝次日因威甯鎮兵見賊退縮以致將弁傷

亡自請治罪等語此次我兵逼近賊巢奮勇勦殺逆匪已大受懲創雖小有挫衄究屬罪不掩功且烏蘭泰尙能轉敗爲勝所請治罪之處著毋庸議烏蘭泰據實陳奏具見不欺若能迅速立功仍當加以懲賞管帶威甯鎮兵之署副將佟攀梅署參將慶祿始則屢催迎敵延不出營迨賊匪撲營輒卽退回致令全勝之後復有挫折實屬罪無可逭佟攀梅慶祿著卽

革職拏問交賽尙阿嚴訊定擬具奏

十五日

庚午

上命軍機大臣傳諭賽尙阿曰廣西勦匪以章政洪秀泉等大股爲最急而南太一帶餘匪未淨地方寫遠深恐鞭長莫及轉致蔓延現在續調各路官兵均可到粵如何分派合擊前已有旨諭令熟籌辦理左江鎮德亮勦賊是否得力仍著隨時察看據實具奏其

各股匪徒除象州會匪外尙有幾股每股約計若干人及賊首姓名均著查明開單奏聞其省城防守各屬團練及保護糧餉各事宜鄒鳴鶴已次第籌辦該大臣到粵後擬駐何處及如何通盤籌畫之處諒有奏報在途矣

上又命軍機大臣傳諭鄒鳴鶴曰粵西勦匪自以象州大股爲最要此外游匪如林聚散靡定亦應遴派大

員分兵督勦不至愈聚愈多勞崇光前駐梧州勦滅
首匪鄧立奇等著有成效著卽飭令該藩司移紮南
甯太平一帶會督該處在事文武協力勦捕毋令延
蔓其梧州一帶仍應派員防勦著該撫會商賽尙阿
妥籌布置至省城防守尤關緊要經該紳士龍啟瑞
朱琦等辦理團練但恐兵力尙單著卽於全州等營
酌調兵丁並添雇壯勇協力防守毋稍疏忽

十九日 甲戌

上命軍機大臣傳諭徐廣縉葉名琛曰逆匪溫大貨五
業經擒獲其夥匪曾亞涓尙有數百之衆難保不因
首匪就擒鋌而走險至劉八凌十八及何名科各股
賊犯尙未擒獲勦辦不容鬆懈現在周天爵已飭令
來京賽尙阿等計已馳抵軍營事權歸一該督兼轄
兩省尤當不分畛域合力兜拏庶可速圖蕩平事以副

朕望

二十日乙亥賽尙阿奏言臣於靈川縣途次接據
廣西提臣向榮咨報金田逆匪屯聚中坪仁義
等村旋因探得逆匪有調百丈等處賊匪助戰
之信該提臣卽令綏靖鎮臣李伏等分帶楚粵
官兵一千七百名及委員許炳東等各帶壯勇
於五月十三日一同渡河攻勦署參將成安卽

於上流河口攻賊之伏先行開仗互相轟擊各
兵壯依次涉水而進該匪卽從嶺後紛紛擁出
各官兵開放連環槍礮奮勇接戰自辰至午傷
斃賊匪百數十名總兵李伏帶兵當先搶上山
梁又斃匪數十人復有大夥賊匪十數股擁來
鎮筭左營把總熊士貴手刃數賊殺入賊隊登
時陣亡總兵李伏以賊多兵寡萬難獨當祇得

撤過小河以免受敵該匪亦未敢渡河卽行折回又中坪仁義等村賊巢水田環繞田塍路窄小河阻滯進退不易卽經督飭各路官兵嚴加防堵一面飛調知府陳瑞芝管帶潮勇一千名二十二日趕到界嶺飭令隨營聽候調遣探知賊衆因鹽糧不繼有欲逃竄之意隨經飛咨副都統烏蘭泰及各鎮嚴密堵截二十五日探得

賊匪洪秀泉等欲攻撲楚兵營盤以圖逃竄卽連夜齊隊豫防將各壯勇伏於架村左右以備分途截殺二十六日寅刻該匪大隊約四五千人果由中坪仁義鄧村擁出至古磨黃岱嶺上屯聚因該處水田及小河甚多卽令陳瑞芝等管帶潮勇伏於下官村後未入流謝繼超督令投誠之陶昌培楊瑞乾壯勇數百名首先誘敵

一面飭各營官兵靜以待之該匪見誘敵壯勇
人少卽有賊匪二千餘人蠭擁而來各壯勇誘
至伏所經陳瑞芝等督令潮勇齊起一擁而出
施放排槍該匪措手不及紛紛倒地並將先鋒
騎馬賊三人立時槍斃餘匪驚潰詹事府主簿
陳登仕等帶領潮勇奮力直前追至小河口該
匪等已涉水奔向古磨嶺上因有小河之隔未

便深入該匪見各壯勇撤後卽分三股一奔架
村一伏寺葉村一越苦瓜嶺欲抄攻官兵營盤
其餘盡占嶺上助勢該提臣卽將楚粵兵勇分
爲五路齊進並令潮勇仁勇由獵山腳進擊該
匪一股約二千餘人仍擁至架村將該處民房
焚燒煙光迷漫經提勇由左邊山腳橫衝攻擊
副將和春督帶楚兵數百名並潮勇仁勇千餘

人搶過架村環攻寺葉村轟斃賊匪數千人將
僞右軍先鋒方標立時殲斃兵壯復追至小河
口因賊匪尙有埋伏卽令官兵壯勇撤回其苦
瓜嶺一股經遊擊瞿騰龍成林督帶楚兵五百
名奮力堵勦該匪見中路敗走亦卽縮回惟要
村一股約千餘人猶敢鳴角舞牌由村外衝出
望大營而來該提臣指揮兵勇併力環攻卽時

清敗我兵追至河岸亦鳴金收軍查點官兵僅
傷斃壯勇數名受傷數名查該逆鹽糧空匱思
欲拚死衝突經兵勇踴躍用命一日之間三戰
三勝俟大兵雲集聲威愈壯似更無難得手惟
該逆匪雖受懲創仍當加意堵截以絕其奔竄
就食之路現經向榮札飭象州武宣桂平平南
各文武官兵於水陸要隘一體嚴防並禁止往

來船隻以防偷渡臣仍授以機宜俾在事文武
併力堵勦其陣亡之湖南鎮筸鎮左營把總熊
士貴應請

飭部照例賜卹

賽尙阿又奏言臣自五月二十一日自長沙起
程六月初四日始抵桂林達洪阿已於初二日
先到巴清德於初六日亦卽趕到查各省官兵

現有受傷受病及怯懦不堪復用者擬卽確查
釐剔如其坐糜糧餉不如挑揀裁撤以期一兵
得一兵之用卽各處練勇招集烏合有首鼠兩
端居心叵測者詳悉甄覈分別妥辦尤當申明
紀律嚴定賞罰庶期一律得力至於粵西通省
情形除桂林一屬尙稱完善此外各府屬羣盜
如毛各股土匪多者數千少者數百而會匪之

兇悍更甚於土匪會匪之黨與亦更多於土匪
周天爵屢言賊勢窮蹙欲以坐困斃之而武宣
大股由金田而東鄉由東鄉而廟旺寺村偏近
象州諸將領各懷意見屢失機宜自五月以來
經烏蘭泰向榮等少挫兇鋒現聞該匪有欲竄
回東鄉之說自當一面密訪一面嚴行堵截儻
有可乘之機斷不敢一誤再誤總使賊之所到

無可掠之鹽糧則匪徒已有困斃之勢再以大
兵分投勦捕當可陸續奏功至湖南會匪接應
之說沿途密訪實無確據可憑不便過事張皇
轉致別滋事端

賽尙阿又奏言查林士傅帶兵勇二千名前赴
賀縣會同肇慶協副將齋清阿勦辦匪徒三月
初五日齋清阿帶領兵勇在里松地方接仗官

兵先勝追至山澗該匪縱火抄後官兵失利該道在龍津橋駐紮離賀縣一百四十里其賀縣壯勇六百名臨打仗時復調回四百名是此役先勝後敗實由林士傅貽誤無疑相應請

旨卽行革職已革賀縣知縣甯璣辦理防堵尙識機宜
林士傅平素官聲尙協輿論擬請將該二員留於軍營差遣以觀後效

賽尙阿又奏言臣行抵廣西省城連日會晤新任巡撫鄒鳴鶴卽署巡撫周天爵詢知平樂柳州潯州鬱林太平鎮安泗城等處各股盜匪多經兵勇勦滅擊散或逃東省去而復來散而復聚股數衆多其由金田竄至象州會匪章政洪秀泉等一股尙在中坪百丈新寨一帶村墟盤踞先經向榮帶湖南兵在賊之東北界嶺紮營

烏蘭泰同秦定三周鳳岐帶貴州兵在賊之西北羅秀紮營候補知府劉繼祖帶領壯勇及張釗水勇在賊之西運江紮駐皆嚴堵其竄往平樂桂平之路而南路之大樟西南路之寺村均係要地經臣札飭總兵經文岱督帶兵弁署右江道張敬修督帶兵勇前往寺村舉人韋仁元帶領猺勇前往大樟堵此兩路庶爲周密臣查

會匪人衆善戰官兵先到者已形疲懈新調之
兵未到會齊尙須旬日又現在六月盛暑南方
炎溼非進兵之時應令各營照前堅堵儻賊匪
出巢竄撲則相機擊退不必窮追但不令竄出
以待新兵一面多購閒諜解散黨與計誘各賊
首自相攜貳俟我新兵雲集八面進攻可爲一
鼓殲除之計此外各股盜匪皆有兵勇堵勦其

大股如凌十八劉八等在廣東省之化州西省
之博白一帶往來竄越現有署臬司楊彤如同
總兵李能臣會帶兵勇勦辦惟南甯太平等府
匪殷衆多亦當籌辦而象州大股尤爲緊要向
榮所帶湖南兵多疲乏不能得力擬令挑選精
壯堪戰者留營餘俟新調兵到前往抽換桂林
省城存兵無多經署藩司吳鼎昌率同在籍翰

林院侍講龍啟瑞御史朱琦等辦理團練最爲周密臣一面會同鄒鳴鵠督飭各府州縣設法鼓勵本地紳士實行團練既以保衛地方且使賊無所掠前此李星沅駐紮柳州係以通省賊勢盛衆柳州居中可以四面策應今各路賊勢忽聚忽散鬱林一帶已有楊彤如等分辦惟象州會匪喫重在省城之南相去僅四百里而柳

州反在賊後擬卽暫駐省城控制俟各省新兵齊到剋期進剿或遣派巴清德達洪阿分帶前往或臣親往督辦之處再行具奏奏入

上命軍機大臣傳諭賽尙阿曰廣西羣盜如毛自用兵以來雖屢獲勝仗時有斬擒總未大加懲創該大臣現抵軍營節制各將事權歸一所陳廣西匪股地勢情形布置均合機宜象州大股逆匪距省不遠固當

嚴防北竄但旣聞有竄向東鄉之說更當嚴飭文武
四面堵截斷不可再令竄回舊巢復致滋蔓此次連
獲勝仗楚兵似尙可用著該大臣體察情形其尙堪
驅策者留在軍營其餘或令回守省城或撤回湖南
防堵酌量辦理道員林士傳旣經查明貽誤屬實著
卽革職與已革知縣甯域均著留於軍營差遣仍查
明能否得力據實具奏該大臣暫駐省城控制全局

巴清德達洪阿烏蘭泰向榮等皆能奮勇圖功堪資
分任應如何分勦合擊度地相機以操勝算想該大
臣必能契合朕意埽蕩賊氛迅奏膚公也

上又命軍機大臣傳諭程矞采曰湖南地方會匪不少
現在廣西賊氛未靖湖南境地毗連若會匪潛相勾
引所關非細著程矞采卽行馳赴湖南督同文武大
員於要隘處所加意防堵仍不動聲色訪查該省會

匪實在情形委爲防備總期弭患未然不可稍涉張皇致滋事端

上諭內閣曰本日據賽尙阿奏六月初四日馳抵桂林巴清德達洪阿亦先後馳到所陳覈汰兵勇申明紀律多購閒諜解散賊黨嚴斷接濟實行圍練使賊無可掠之食無可竄之路籌畫均合機宜該大臣等經朕特簡畀以重任到粵之始卽能通籌全局條理秩

然深慰朕念著發去黃馬褂二件大荷包一對小荷包一對火鎌一箇賞給賽尙阿祇領黃馬褂二件分賞巴清德達洪阿祇領粵西地近瘴鄉時當炎暑現值用兵之際朕念軍士勤勞馳驅用命瞻懷南服宵旰難忘惟望迅帰賊氛俾吾民咸登衽席不特該大臣等渥膺懋賞卽文武員弁紳士壯勇亦得共荷恩施用酬勞勸朕實有厚望焉

上又諭內閣曰此次一日之間三戰三勝該提鎮等督
率有方尙知奮勉所有出力官弁兵壯人等著卽查
明保奏候朕施恩陣亡之把總熊士貴著交部照例
賜卹

賽尙阿又奏言臣奉

命馳赴廣西辦理軍務荷蒙

皇上天恩飭發內庫銀一百萬兩戶部籌撥銀一百萬

兩江南鹽庫銀六十萬兩計已足可敷用惟軍
旅以糧餉爲急務必須寬爲儲備經臣函致兩
廣督臣徐廣縉於粵海關稅項下截留銀一百
萬兩一俟需用之時由臣奏

聞批解相應請

旨飭下兩廣督臣於關稅項下按季扣存連現在批解
之款統歸一百萬兩之數聽候臣奏明撥解臣

仍嚴飭覈實撙節不得絲毫濫用以重軍儲奏

八

上命軍機大臣傳諭徐廣縉葉名琛曰廣西軍營糧餉至要必當寬爲儲備以免臨事周章著徐廣縉葉名琛仍於關稅項下按季扣存連前次已經撥解之二十萬兩統籌備銀一百萬兩聽候賽尙阿咨撥委解毋稍遲誤